

中國歷代博士制度考

賈馥茗

緒言

「博士」一名，今之言者取義頗泛，而於其本旨，或多忽諸。自歐風東漸後，人率知博士爲學位之一，且居其極，言博士卽所以言學之有成；顧博士之制，我固有之，雖與今所指者不盡相同，而其涵意頗有近似處。惠棟有云：「博士，秦官也，博者博通今古，士者辨于然否。」則知我國之所謂博士，亦指學問淵博，能審察明鑑之士而言。以其學問之宏博也，故可以爲人之師以至爲王者之師，以啓迪人之所不知，以指正人之所不明；以其能辨于然否也，故知有所能爲而爲之，與夫有所不能爲而不爲，所以爲聖智，爲賢哲，爲衆人之模楷。而我國博士之興，且在紀元前數百餘年，謂我國之文化落後得乎？漢代以後，博士成爲定制，王者爲置弟子，從之問學，名人學者，不乏出於博士門下者，則儒學之得以有傳而發揚光大，士子之得有師承而學有成就者，博士之功偉矣，爰述歷代博士制度之崖略，以見吾國文化之悠且久等焉。

一、博士之起源及類別

博士之起源甚早，史記循吏傳載稱：春秋時公儀休爲魯博士，以高第爲魯相，奉法循理，無所變更，則春秋時已有博士，且已明言其人。漢書百官公卿表考證云：「博士、秦官。沈約宋志曰：『按六國時往往有博士』。考淳于髡爲齊博士，魏有博士，賈祛宋有博士魏平。又史記始皇本紀云：『二十八年，始皇還過彭城，……浮江至湘山祠，逢大風，幾不得渡，上問博士曰：湘君何神？博士對曰：聞之堯女舜之妻而葬此。』又三十四年，始皇置酒咸陽宮，博士七十人前爲壽，僕射周青臣進頌娛始皇，博士齊人淳于越責其諛君而言改制，事不師古，不得長久，丞相李斯以爲諸生不師今而師古，以非當世，入則心非，出則巷議，因請史官非秦紀，皆燒之，非博士官所職，天下有敢藏詩書百家語者，悉詣守尉雜燒之，有欲學法令者，以吏爲師，則秦時博士爲官職之一可知。始皇時，博士多至七十人。觀其職責，似掌詩書百家語，備皇帝顧問者，雖始皇天性剛戾自用，起諸侯，併天下，意得欲從，以爲自古莫及而專任獄吏，獄吏得以親幸，博士不過備員而已，而博士制於此，已昭然可考矣。

漢興，博士相率來歸。叔孫通本秦時以文學徵待詔博士，及漢王入彭城，叔孫通率儒生弟子百餘人降漢，漢王仍拜通爲博士，（見史記叔孫通列傳）班固曰：「博士，秦官，漢因之，漢博士多至四十人。」（引見通志職官四）兩漢冠漢儀云：「文帝博士七十餘人，爲待詔，博士朝服元端章甫冠。」武帝建元五年，初置五經博士，博士掌教授五經自此始。

考歷代職官，太常皆有博士。太常之官曰太常卿，秦時名奉常，漢初曰太常，顏師古曰：「太常者，王者之旌也，晝日月焉。王者有事則建以行，禮官主奉持之，故曰奉常。後改爲太常，大之義也，惠帝更名奉常，景帝六年，更名太常。後漢秩與漢同，每祭祀前，奉其禮儀及行事，贊天子，每選試博士，奏其能否。」（見通志職官四）又文獻通考載魏之博士屬太常，掌引導乘輿，王公以下應追諡者，則博士議定之。是知太常博士，禮官之屬也。武帝所置之五經博士，亦屬太常，然掌各以經教授，及立太學，遂爲太學博士，東漢博士增至十四人，各掌以五經教子弟，國有疑事，掌承問對，則此之博士，皆爲學有專長，足以啓迪後學，故置之使講學於太學中，其後國子學及國子監立，遂又有國學博士，要皆爲教授生徒，備天子顧問者，屬於學官之流，與太常博士之屬禮官者，自有別也。

二、歷代博士制度之沿革

博士一官，首見於春秋，六國時亦往往有博士，至秦而成爲定制，始皇時有博士七十餘人，巡狩天下，往往用以自隨，二世時博士尙與諸生並存，漢興而秦之博士歸之，然時承百王之弊，高祖急於撥亂反正，未遑庠序之教，文景務在養民，至於稽古禮文之事，猶多闕焉。然史載文帝時亦有博士七十餘人，董仲舒且曾爲景帝時之博士；武帝尊崇儒者，以魏其武安侯爲相，用董生之言，推明孔氏，罷黜百家，置五經博士以倡明儒學（五經爲魯詩、歐陽書、后倉禮、田何易、公羊春秋），宣帝增博士爲十二人，博士選有三科，高第爲尙書，次爲刺史，其不通政事以久次補請侯太傅。王莽時增樂經博士，共爲六經，每經置博士五人，計三十人。及光武中興，愛好經術，未及下車而先訪儒雅，探求闕文，補綴漏逸，四方之士，抱負墳策，雲集京師，於是立五經博士，各以家法教授，易有施、孟、梁邱、京氏，尙書歐陽、大、小夏侯，詩齊、魯、韓、禮大、小戴，春秋公羊、嚴、顏、各一，凡十四博士。博士高第爲侍中，小郡若都尉，博士限年五十。安帝時以博士多非其人，詔命三公、將軍、中二千石舉博士各一人，各得經明行高，卓犖茂異，是時群僚承風，凡所旌賞，綽有餘裕。又平帝元始四年，曾改博士爲博士師，後漢兼而存之。考西漢博士，除叔孫通等由秦歸降者外，多由保舉而來，東漢博士則由太常選試，爲選舉考試二者之結果，惟有限年之制耳。（見通志職官四及後漢書儒林傳）

三國時先主定蜀，承喪亂歷紀，學業衰廢，乃鳩合典籍，沙汰衆學，以許慈爲博士，而尹默精於左氏春秋，其子宗，傳其業爲博士。（三國志蜀志許慈尹默列傳）魏文帝黃初五年夏四月，立太學，制五經課試之法，置春秋穀梁博士。明帝太和元年，有詔選博士，以才堪任用，經學爲先爲標準。（詔中有云：尊儒貴學，王教之本也，自頃儒官或非其人，將何以宣明聖道，其高選博士，才任侍中常侍者，申勅郡國貢士，以經學爲先。）至曹髦爲高貴鄉公時度峻爲尙書博士，淳于俊爲易博士；髦爲帝後，且曾幸太學問諸儒。（三國志魏志）治資通鑑卷七十八載「景元三年，吳主喜讀書，欲與博士祭酒韋昭，博士盛冲講論

。則三國雖在戰亂之餘，亦未嘗廢儒學，且皆重視博士之人選與職務。

晉初承魏制，置博士十九人，咸寧四年，武帝初立國子學，定置國子祭酒博士各一人，助教十五人以教生徒，博士取履行清淳，通明典義者，若散騎常侍，中書侍郎，太子中庶子以上乃得召試。及江左初，減爲九人。元帝末增儀禮，春秋公羊博士各一人，合爲十一人，後又增爲十六人，不復分掌五經而謂之太學博士，前此則爲國子博士。（元帝時荀崧上疏曰：「咸寧、太康、永嘉之中，侍中、常侍黃門，通洽古今，行爲世表者，領國子博士，見通志職官四。」）南朝宋齊諸博士皆卑朝服，進賢兩梁冠，佩水蒼玉，宋有國子博士一人，（見宋書百官志）齊有博士二人，謂之太學博士。（見南齊書百官志）梁國學有博士二人，天監四年置五經博士各一人。通志載梁置太學博士八人，陳因之。後魏亦然。北齊國子寺有太學博士十人，後周置太學博士，下士大夫六人。

隋文帝統一南北，仁壽元年省國子寺，唯立太學博士五人。大業三年復置國子博士一人，太學博士減置三人。

唐興增置國子博士，龍朔二年改爲司成宣業，咸亨初復舊，諸州府且有經學博士一人，太學博士因舊制，仍爲三人。考唐自高祖迄太宗，國內既平，武功特盛，開疆拓土，領域遼濶，國勢之強，與漢代並稱於史乘。太宗雄才大略，武功之餘，獎勵文學，後之君主繼之，學校建興，文風遠被，博士亦隨學校之增置而益多，除上述者外綜計之，尚有下列各類：

廣文館博士一人。

四門博士二人。（後魏書劉芳表云：「太和二十年，立四門博士，於四門置學，……請移與太學同處，從之。」北齊二人，隋五人，唐二人。）

律學博士一人。（律學博士本晉置，屬廷尉，梁曰胄子律博士，陳亦有律博士，後魏北齊併有之。隋大理寺官屬有律博士八人，唐因之而置一人。）屬國學，掌教文武八品以下及庶人之子爲生者，以律令爲專業，格式法例兼習之。）

書學博士三人。掌教文武八品以下及庶人之子爲生者，以石經、說文、字林爲專業，餘字書兼習之。

算學博士二人。掌教文武八品以下及庶人之子爲生者，二分其經以爲之業，習九章、海島、孫子、五曹、張邱建、夏侯陽、周髀等及綴術緝古之術，其記遺三等數亦兼習之。（通志職官四）

宋興，博士多承唐制，置太學博士十人，武學博士二人，律學博士一人。太學博士掌分經講授，考校呈文，以德行道藝訓導學者。武學博士掌以兵書弓馬武藝訓誘學者。律學博士掌傳授法律及校試之。元祐元年置太學博士一員，崇寧元年省去，元符三年復置。大觀元年置國子博士四員，太學辟雍博士共置二十員，四年詔省辟雍博士五員，政和元年詔依舊制，隆興後定國子博士一員，太學博士三員。（見宋史職官志四）

遼金雖起於塞外，然以向慕華夏文風，亦有博士之官，遼之國子學，州學，縣學皆設有博士。（遼史百官志三）金有國子

博士二員，分掌教授生員，考藝業；太學博士四員，大安二年減二員。（金史百官志）

元世祖至元二十四年立國子學而定其制，設博士通掌學事，分教三齋生員，講授經旨，是正音訓，上嚴教導之術，下考肄習之業。（元史百官志四）

明代國子監博士廳有五經博士五人，翰林院有五經博士九人，後者且爲世襲。

清朝國子監之博士廳置有滿漢博士各一員，此外並有五經博士，另太常寺亦有滿漢博士各一員。

太常司禮之博士自秦及兩漢皆設之，魏亦置博士，晉因之，後魏北齊亦皆有太常博士。（文獻通考職官九）唐置四人，掌辦五禮，按王公三品以上功過善惡爲之誼，大禮贊卿導引。宋置博士四人，掌定五禮，儀式有改革則據經審議，凡於法應諡者考其行狀，撰定諡文，有祠事，監視儀物，掌凡導引之事。遼南面官有太常寺博士，金太常寺有博士二人，掌檢討典禮。元有太常博士二人，虞集爲太常博士，爲丞相拜珠所敬重。明有博士二人，講習禮文，請帝填名祝版，大禮導贊其儀，南京太常寺則有博士一人。（上見續通典職官七）清太常寺滿漢博士各一人。（清文獻通考）

博士之品秩，西漢秩比六百石，東漢六百石，魏設九品官人之法，以品計秩，博士爲第六品，晉宋皆因之，梁秩祿之差如前代，更定十八班，太常博士爲九班，五經博士爲六班，胄子律博士爲三班，太學博士爲二班。班以數多者爲上，卽十八班爲最高也。陳多因梁制，惟以九品計秩，五經博士爲第六品，太學博士及胄子律博士爲第八品。後魏國子博士屬第五品上階，太學博士及太常博士屬從七品，四門小學博士及律博士屬第九品上階。北齊之博士及職官與北魏同，惟多諸宮教博士一種，屬從九品。後周則有小學博士，爲四命。隋之博士較多，其品秩分列如下：

國子博士——正五品上階。

太學博士、太常博士——從七品。

四門博士——從八品上階。

大理寺律博士——正九品上階。

按庭局諸宮教博士、書學博士、算學博士——從九品上階。

唐之博士有新置者，而因於隋者亦不少，其品秩：

國子博士——正五品上階。

太學博士——正六品上階。

四門博士——正七品上階。

太常博士——從七品上階。

太醫署博士——正八品上階。

太醫署鍼博士——從八品上階。

京兆，河南、太原府、大都督府、博士——從八品上階。

律學博士、中都督、下都督府、上州博士——從八品。

中州博士——正九品上階。

下州博士——正九品。

書學博士、算學博士、太醫署按摩咒禁博士、中州下州醫博士——從九品。

宋代太常與國子博士皆爲正八品，武學律學博士皆爲從八品。金之國子監與太學博士皆爲正七品。元之蒙古國子學博士集賢院國子學博士，太常禮儀院博士皆爲正七品。明之太常博士正七品，翰林院五經博士正八品，國子監五經博士從八品。清太常寺博士爲從六品，國子監博士爲七品。翰林院五經博士爲正八品。

三、博士弟子

博士弟子爲兩漢之正名。前此叔孫通爲秦博士，率儒生弟子百餘人歸漢，其時雖尙無博士弟子之名，而名師大儒，皆有從之向學而爲弟子者。武帝興太學，置五經博士，從丞相公孫弘之請，元朔五年爲博士置弟子五十人，制復其身，太常擇民年十八以上，儀狀端正者補博士弟子，郡國縣道邑有好文學，敬長上，肅政教，順鄉里，出入不悖所聞者令相長丞上所屬二千石，二千石謹察可者當與計偕，詣太常，得受業如弟子。博士弟子既經選擇而來，並定時考課之，歲一次，能通一藝以上者補文學掌故事，高第可以爲郎中者籍奏，有秀才昇等輒以名聞，其不事學若下材及不能通一藝輒罷之，不稱者罰。（見漢書武帝紀）方初置博士時，尙未明制置弟子，博士雖各以經授徒，而無考察試用之法，至是爲皆有定制。計西漢以博士弟子入官者有息夫躬、兒寬、終軍、朱雲、陸弘、蕭望之、匡衡、馬宮、翟方進、何武、王嘉、施讐、房鳳、召信臣等人。多有官至丞相太傅者。（見文獻通考及各本傳）兩漢博士弟子，亦稱太學生，太學生自武帝以後，昭帝增滿百人，宣帝末增倍之，元帝設員千人，成帝時有太學生三千人（見文獻通考學校考）。及鄧后稱制，學者頗懈，安帝薄於藝文，博士多倚席不講，朋徒怠散，學舍頽敝。順帝感翟醜之言，更修學舍，凡所構造二百四十房，千八百五十室，順帝時學生數達三萬人。

三國時雖皆有博士，然干戈之餘，文學不興，黃初元年修太學，始有弟子數百人。太和青龍中，中外多事，人懷避就，雖性非解學，多求詣太學，太學諸生有千數。晉武帝初定中原，粉飾太平，太學生有三千餘人。太始八年達七千餘人，然流品不齊。東晉儒術漸衰，孝武太元初無復國子生，唯置太學生六十人。（文獻通考學校考）

南朝宋初太宗置總明觀以集學士，齊高帝建和四年，立國學置學生百五十人。武帝永明三年，省總明觀，召公卿以下子弟

，置生二百二十人，其年中秋悉集（同前）。梁武帝天監四年設五館，置五經博士，五館生徒不分貴賤，每館各數百人，給其餼廩。（南齊書禮志及文獻通考學校二）

北魏道武帝始於平城立太學，置五經博士，生員千餘人，天興二年增國子太學生員三千人。宣武時樹小學於四門，大選儒生以爲小學博士，學生四十人。正光三年置國子生三十六人，（以上見文獻通考學校考）。北齊唯國子一學，生徒數十人，孝昭帝時國子學生七十二人，太學生二百人，四門學生三百人。（北齊書孝昭帝紀）

隋仁壽元年以天下生徒多而不精，唯簡留國子學生七十人，改國子爲太學。

唐國子學生三百人，屬一等貴族子弟，太學生五百人，屬二等貴族子弟，四門學生一千三百人，其中五百爲貴族子弟，八百爲平民子弟。律學生五十人，書學算學各三十人，醫學生四十人，弘文館學生三十人，崇文館學生二十人。各生限年十四以上，十九以下，律學則十八以上，二十五以下。（文獻通考學校考）

宋神宗熙寧元年增太學生員，慶歷中曾置內舍生二百人，至是又增置一百，尋復以九百人爲額。元豐二年頒學令，太學置八十齋，齋容三十人。學生分三等，外舍生一千人，內舍生三百人，上舍生一百人，總計二千四百人。武學以百人爲額，醫學以三百人爲額。南宋高宗建炎十三年，建太學，養士七百人，紹興十四年建宗學於臨安，學生以百員爲額。（文獻通考學校考）

元世祖設國子監，定生員額二百人，後增至四百人。（元史世祖紀）明南京北京皆有國子監，生員通稱監生。清代仍因之，唯以捐監之制興，而監生之類頗雜。

綜觀博士弟子，定名於西漢，間亦稱太學生，東漢因之，博士之選，以通經名儒爲準，弟子從之，得有師承，歷代太學之盛者，學生多至數萬，學者雲集，尉以成風，博士及弟子之言論，往往影響朝政，設政治清明，其言論固爲當政者所採納，如奸邪當道，往往反爲所傷，而在生徒衆多時，亦不免於流品龐雜，要之其爲學生之正統，太學與國子爲儒學之延續，在教育史上，應佔有相當價值也。

四、西漢至明儒林中博之士人選

歷代博士率與儒林有關，蓋博士者必通經而學有所長，而通經之儒，爲學者從之向學之鵠的，故博士中或於爲博士之前，或於致仕之後，往往教授生徒，而西漢之博士由選舉而來，其在爲博士之前授徒者，必遠近聞名，是以入選而爲博士，而身任博士者，於官學之外，亦或作私人講學，以是博士多列於儒林之中，茲就漢以後歷代儒林中之爲博士者略舉之，以觀涯略，至清代博士人員減少，教授衆多，故從略焉。

○ 西漢。

叔孫通。秦時以文學徵待詔博士，二世無道，率儒生弟子百餘人歸漢，漢王拜通爲博士。（見史記叔孫通列傳）

賈誼。雒陽人，年少頗通諸子百家之書，文帝召以爲博士。（見史記賈誼傳）

鼂錯。潁川人，以文學事太常掌故，孝文時天下亡治尙書者，獨聞齊有伏生，故秦博士，治尙書，年九十餘，老不可徵，乃詔太常使人受之，太常遣錯受尙書伏生所，還，因上書稱說，詔以爲太子舍人，門大夫，遷博士。（見漢書鼂錯傳）

韓嬰。以治詩孝文時爲博士，卽後傳之韓詩是也。（見漢書儒林傳）

轅固。以治詩孝景時爲博士，卽後傳之齊詩。

毛公。以治詩爲河間獻王博士，卽後傳之毛詩。

戴聖。以博士論石渠官至九江太守。所傳爲小戴禮。

胡毋生。以治公羊春秋爲景帝博士。

嚴彭祖。以治公羊春秋爲宣帝博士，與顏氏同列。

江公。授穀梁春秋及詩於魯申公，傳子至孫爲博士。（以上俱同前）

董仲舒。以治春秋孝景時爲博士，下帷講誦，弟子傳以久次相受業，或莫見其面，蓋三年不窺園舍，進退容止，非禮不行，學士皆師尊之。（史記儒林傳）

施讎。曾從博士田王孫受易，與孟喜梁邱賀等並爲門人，後以梁邱賀薦詔拜爲博士。

歐陽生字伯和，曾事伏生，後以所學授兒寬，寬又授歐陽生之子，至曾孫高爲博士。

周堪。與孔霸俱事大夏侯勝，霸爲博士。堪後授牟卿，牟卿爲博士。

張山拊。事小夏侯建爲博士，論石渠。

王氏。曾爲昌邑王之師，後詔除下爲博士。（以上見漢書儒林傳）

夏侯勝。從始昌受尙書及洪範五行傳說災異後事簡卿，又從歐陽氏問爲學精孰，善說禮服，徵爲博士。（漢書夏侯勝傳）

○東漢。

注丹。世傳孟氏易，王莽時常避世教授，專志不仕，建武初爲博士。

任安。少遊太學，受孟氏易，兼通數經，學終還家教授，諸生多自遠而至，後辟除博士。

張興。習梁邱易以教授，辟司徒馮勤府，稍遷博士，後爲太子少傅，以聲稱著聞，弟子自遠至者著錄且萬人。

戴憑。習京氏易，初舉明經，徵試爲博士。

歐陽歙。自歐陽生傳伏生尙書，至八歙世皆爲博士。

牟長。建武二年辟拜博士，諸生從之者常有千人，著錄前後萬人。

周防。從蓋豫受古尚書，舉孝廉。太尉張禹荐補博士。

楊倫。習古文尚書，曾講學於大澤中，弟子至千餘人，後特徵博士，爲清河王傅。

高翔。世傳魯詩，以信行清操知名，王莽篡位逃不仕，光武徵爲博士。

魏應。少好學，詣博士習魯詩，舉明經，除濟陰文學，以疾免，教授山澤中，徒衆常數百人，永平初爲博士。弟子自遠方

至者著錄數千人。

伏恭。太常經試第一，拜博士，遷常山太守，敦修學校，教授不輟，由是北州多爲伏氏學。

薛漢。世習韓詩，尤善說災異讖緯，教授常數百人，建武初爲博士。

董鈞。歷舉明經孝廉，博通古今，永平中爲博士，常教授門生數百人。

周澤。少習公羊嚴氏春秋，隱居教授，門徒常數百人，建武末徵爲博士。

丁恭。習公羊嚴氏春秋，學義精明，教授常數百人，建武初爲博士，諸生自遠方至者著錄數千人，當世稱爲大儒。

甄宇。習嚴氏春秋，教授常數百人，建武中徵拜博士。

張立。習顏氏春秋，兼通數家法，學生著錄千人，及顏氏博士缺，以策試第一拜爲博士。

李育。少習公羊春秋，沉思專精，博覽書傳，建初拜爲博士。

③ 晉。晉有博士之設，儒林中多有被徵爲博士者，然率未就職而教授於山林，或與世亂有關也。

虞喜。少立操行，博學好古，懷帝時公車徵拜博士不就，太寧中以博士徵不就，再徵辭疾，朝廷嘗遣就諮訪焉。

劉兆。博學洽聞，溫篤善誘，從受業者數千人，武帝時五辟公府三徵博士皆不就。

徐苗。累世相承皆以博士爲郡守，苗曾受業於宋鈞，公府五辟博士再徵並不就。

杜夷。世以儒學稱，爲郡著姓，少家貧不營生產，博覽經籍百家之書，算曆圖緯靡不畢究，在鄉教授生徒千人永嘉初公車

徵拜博士，太傅東海王越辟並不就。

范宣。善三禮，詔徵太學博士散騎郎並不就，子輯歷郡守國子博士。

范弘。雅正好學，以儒術該明爲太學博士。（以上見晉書儒林傳）

④ 南朝。

伏暉。幼傳文業，能言玄理，武帝踐祚兼五經博士，後徵爲國子博士。

嚴植之。少善莊老能玄言，精解喪服孝經論語，及長，編習鄭氏禮，周易、毛詩、左氏春秋，天監中兼五經博士。

卞華。通周易及五經，梁天監中兼五經博士。

崔靈恩。少篤學，徧習五經，尤精三禮三傳，仕魏爲太常博士，天監十三年歸梁兼國子博士，聚徒講授，听者常數百人。孔僉，少師事何胤，通五經，尤明三禮孝經論語，講說並數十篇，生徒亦數百人，三爲五經博士，子淑玄官至太學博士。盧廣。少明經有儒術，天監中歸梁兼國子博士，徧講五經。

沈峻。好學通五經，尤長三禮，徐勉書荐兼五經博士，於館講授，听者常數百人，同時吳郡張及，會稽孔子雲，皆官五經博士。

沈文阿。通三禮三傳，位五經博士紹泰元年入爲國子博士。

沈珠。父爲梁國子博士，少方雅好學，通三禮春秋左氏傳，精識強記，陳武帝入輔，除國子博士。與沈文阿同掌儀禮。戚袞。少聰慧，遊學都下，受三禮於國子助教劉文紹，後兼太學博士。

張璣。幼聰俊有思理，年十四通孝經論語，篤好玄言，後主嗣位爲國子博士東宮學士。

顧越。幼勵精學業，弱冠遊都下，向學於通儒，武帝時爲五經博士，承聖二年領國子博士，紹泰元年復徵爲國子博士，陳天嘉中遷給事中黃門侍郎國子博士。（以上見南史儒林傳。）

⑤ 北魏。

梁越。少好學，博綜經傳，性純和篤信，國初爲禮經博士。

張偉。學幽諸經，講授於鄉里，受業者常數百人，世祖時拜中書博士，轉侍郎。

梁祚。篤志好學，歷治諸經，尤善公羊春秋及鄭氏易，曾爲中書博士，清貧守素，不交世貴。

平恒。勤讀書，研綜經籍，鈎深致遠，多所博聞，安貧樂道，不以屢空改操，徵爲中書博士。後爲幽州別駕，廉貞寡欲，不營資產，衣食不足，妻子至不免於飢寒。

張吾貴。少聰慧，容貌奇偉，本郡舉爲太學博士。曾在夏學聚徒千數。

孫惠蔚。少年粗通詩書及孝經論語，後師董道濟講易，又從程玄讀禮經及春秋三傳，荐爲中書博士，轉皇宗博士。

董徵。好古學，尙雅素，從清河監伯陽受論語、毛詩、春秋、周易、太和末爲四門小學博士。

盧景裕。少聰敏專精爲學，謙恭守道，除國子博士。

李同軌。學綜諸經，兼讀釋氏，好醫術，遷國子博士。（以上見北魏書儒林傳）

⑥ 北齊。

李鉉。曾從李國仁受毛詩尙書，劉子猛受禮記，房科受周官儀禮，鮮于靈馥受左氏春秋，後從大儒徐遵明受業，稱高第，

州舉秀才，除太學博士。

刁柔。少好學，綜習經史，尤留心禮儀，天保初除國子博士。

張買奴。經義該博，門徒千餘人，諸儒咸推重之，歷太學博士，國子助教。

劉歸思。說詩甚精，天統中任國子博士。

鮑季祥。明禮，兼通左氏春秋，卒於太學博士。

邢峙。少好學，通三禮左氏春秋，天保間授四門博士。

馬敬德。少好儒術，從徐遵明學詩禮，又精研春秋左氏，教授於燕趙間，生徒隨之者甚衆，初授國子助教，遷太學博士，

天統初除國子博士。

張雕。通五經，尤明三禮，弟子自遠方就業者以百數，乾明初除國子博士。

孫靈暉。少明敏有器度，通三禮三傳，擢授太學博士。（以上見北齊書儒林傳）

⑤ 北周。

沈重。博覽群書，尤明詩禮及左氏春秋，大同二年除五經博士。天和中講三教義于紫極殿，朝士儒生桑門道士至者二千餘人，學業該博，爲當世儒宗。

樊深。少從師講習五經，太祖置學東館，以深爲博士，後除國子博士，又拜太學助教遷博士。

熊安生。少好學，曾學三傳及周禮，博通五經，以三禮教授，弟子自遠方至者千餘人，先爲國子博士，又拜露門博士。

樂遜。從徐遵明學孝經、喪服、論語、詩書、禮、易、左氏春秋大義，以經術教授，甚有訓導之方，天和中爲露門博士。

（以上見周書儒林傳）

⑥ 隋。

蕭該。少學詩書春秋禮記，通大義，尤精漢書，開皇初拜國子博士。

房暉遠。世傳儒學，幼有志行，治三禮、春秋、三傳、詩、書、周易、兼善圖緯，恒以教授爲務，遠方負笈而從者動以千

計。高祖受禪爲太常博士，後爲太學博士。

馬光。少好學，圖書識緯莫不畢覽，尤明三禮，爲儒者所宗，開皇初授太學博士。

劉炫。少以聰敏見稱，讀書十年不出戶，除太學博士，歲餘去官。

褚輝。以學三禮稱於江南，煬帝徵天下儒士集內史省，相次講論，輝博辯無能屈者，遂擢爲太學博士。（以上見隋書儒林傳）

⑨ 唐。

徐文遠。少貧，嘗閱書於肆，博覽五經，尤精春秋左氏傳。開皇中累遷太學博士，大業初擢授國子博士，經王世充之變，復至京師爲國子博士。

陸德明。精於易，太宗時補太學博士，後復拜國子博士。

賈公彥。永徽中官至太學博士。

蓋文達。博涉經史，尤明三傳，性方雅，有士君子之風，貞觀中卒於國子博士。

谷那律。貞觀中累補國子博士。

許叔牙。少精於毛詩、禮記、尤善諷詠，貞觀初遷太常博士。

劉伯莊。貞觀中累除國子助教，尋遷國子博士。

羅道琮。勤於學業而慷慨有節義，以明經登高第，高宗末官至太學博士。

王元感。少舉明經，後爲四門博士。

韋叔夏。精通三禮，舉明經，累除太常博士。

尹知章。少勤學，神龍初轉太常博士，歸家則講授不輟，明於易及莊老玄言之學，遠近咸來受業。

徐岱。好學，六籍諸子悉所探究，建中年間爲太常博士。

陸質。明於經學，尤深於春秋，爲太常博士，後爲國子博士。（以上見舊唐書儒學上下）

孔穎達。幼敏慧，長明春秋、鄭氏尚書、詩、禮記、王氏易，善屬文，通步曆，太宗平洛，授文學館學士，遷國子博士。王恭。少篤學，教授鄉閭弟子數百人，貞觀初詔拜太學博士，講三禮，別爲義證甚精博。

馬嘉運。少爲沙門，還治儒學，長議論，貞觀十一年詔拜太學博士弘文館學士，終於國子博士。

伯莊。由弘文館學士遷國子博士，與許敬宗等論撰甚多。

⑩ 宋。

聶崇義。少學三禮，善禮學，通經旨，後漢乾祐中累官至國子禮記博士，周顯德中累遷國子司業兼太常博士。

邢昺。太平興國初舉五經，太宗時以九經及第，遷尚書博士，後轉國子博士。

孔維。乾德四年九經及第，太平興國中拜國子周易博士，後遷禮記博士。

尹拙。子季通官至國子博士。

田敏。少通春秋，後梁貞明中登科，留爲國子四門博士，後唐天成初改尙書博士，滿歲爲國子博士，後以詳明典禮兼太常博士。

李覺。太平興國五年舉九經，太宗時遷禮記博士，又遷國子博士。

崔頤正。舉進士，明經術，爲國學直講，年老致仕，仍充直講，改國子博士。

胡瑗。曾以經術教授湖州，教人有法，科條纖悉備具，雖盛暑，必公服坐堂上，嚴師弟子之禮，視諸生如其子弟，諸生亦敬愛之如父兄，從之遊者常數百人，居太學時，生徒益衆，太學至不能容，後以太常博士致仕歸，老於家。

林槩。父高爲太常博士，槩亦爲太常博士集賢校理。

洪興祖。少讀禮，至中庸頓悟性命之理，績文日進，登政和上舍第，後爲太常博士。

呂祖謙。學本之家庭，有中原文獻之傳，初蔭補入官，後舉進士，復中博學宏詞科，除太學博士。

葉適。爲文藻思英發，擢淳熙五年進士，爲太學正，遷博士。

蔡幼學。年十八試禮部第一，光宗立以太學錄改武學博士。

胡安國。初入太學，中紹聖四年進士第，爲太學博士，足不躡權門。

葉味道。少刻志好古學，師事朱熹，試禮部第一，登嘉定十三年進士第，理宗時授太學博士兼崇政殿說書。（以上見宋史

儒林傳）

① 元。

金履祥。學者稱仁山先生，元統初里人吳師道爲國子博士。

周仁榮。泰定初爲國子博士。（見元史儒學傳）

② 明。

呂柟。學者稱涇野先生，正德三年登進士第一，劉瑾與同鄉，欲致之，謝不往，後荐授國子博士。

尤時熙。幼警敏不群，宗王守仁之學，論議切於日用，不爲空虛隱怪之談，入爲國子博士，學者稱西川先生。

元卿。初舉隆慶四年鄉試，對策以極陳時弊下第，後以荐爲國子博士。

孔聞禮。孔子六十二代孫，正德元年授五經博士。

顏希惠。顏子五十九代孫，景泰三年詔爲五經博士。

曾質粹。曾子五十九代孫，嘉靖十八年授五經博士。

孟希文。孟子五十六代孫，景泰三年授五經博士。

仲子階。仲子六十二代孫。崇禎十六年授五經博士。

周冕。濂溪周子十二代孫。景泰七年授五經博士。

程接道。程子後，崇禎三年授五經博士。

程克仁。程子十七代孫。景泰六年授五經博士。

張文運。橫渠張子十四代孫。天啓二年授五經博士。

朱挺。朱子九世孫。景泰六年授五經博士。朱子十一代孫暨嘉靖二年授五經博士。（以上見明史儒林傳）

儒林中之爲博士者，以太學、國子、太常等博士爲多，以其所掌繫乎儒學也。而博士之選，必以經明行修爲準，故歷代大儒，往往任博士之職，若漢之賈誼董仲舒，宋之胡安定，皆一時首選也。其上有博士祭酒，猶未列入本節之中，而本節所舉，雖極盡簡略，亦可以見博士之學行，足爲學者之範式也。

結 論

儒學爲我國學術思想之正統，考其源出於司徒之官。以其足以正君臣，明貴賤，美教化，移風俗也。始皇燔詩書，坑儒生，刑法之吏用事而儒道衰，漢武興太學，置五經博士，重用儒生，漢家宰相，率多精通一經，朝廷有疑事則引經爲斷，王莽更始之亂，禮樂分崩，典文殘落，及光武中興，愛好經術，學者復會於京師，更置五經十四博士，各以家法授徒。是以博士之制，起源於春秋戰國，定於秦而盛於兩漢，自武帝置博士弟子，後代屢增員額，太學生徒至萬數，往往學風所及，影響朝政，而及於社會者尤深焉。晉自永嘉之後，運鍾喪亂，宇內分崩，俎豆之事不見，戎馬之跡獨存，高才鴻儒，遁逃山林，不惟視青紫如土芥，卽博士之職，亦避而不就，於是老莊盛行，儒道復衰，宋齊或時設國學，而以遷遞多變，幾同具文，梁五館並設，史稱尙學，然至陳而衰。此魏道武帝重學，立教授博士，齊周因之，猶勝南朝。隋初儒學漸興，唐因隋制，學校開設頗多，貞觀中徵天下儒士以爲學官，太宗數幸國學，听博士講論，上之所行，下必效之，文風之盛，遠被異域，惜科舉漸興，學者重登科入仕而不探求經旨，宋因之，科舉之弊益彰，雖胡安定等曾爲博士，而學者終不能脫科舉之羈絆也。明太祖厲行專制，學者思想爲所束縛，博士及監生存而儒學趨於沒落矣。清代以異族入主中原，教職不復重在博士，至新學制興而古之博士制遂於焉告終。然通觀歷代國學以儒爲宗，博士傳其業而學者從之，是以我國儒家之基礎穩固，終成正統學派也。